

四庫全書

集部

欽定四庫全書

集部

東坡全集卷一百十五

詳校官庶吉士

臣謝恭銘

檢討臣何思鈞覆勘

總校官進士

臣

朱鈐

校對官修撰

臣

吳錫齡

謄錄監生

臣

劉廣恕

欽定四庫全書

東坡全集卷一百十四

宋 蘇軾 撰

內制表本一十七首

皇帝為冬節奏告永裕陵神宗皇帝表本

伏以歷紀天正史書日至感舒長於測景增怵惕於履  
霜恭惟謚號皇帝德邁堯仁功恢禹迹游衣冠於原廟  
徒仰威神望松栢於橋山永懷悲慕

皇太后殿夫人為冬節往永裕陵酌獻神宗皇

帝表本

伏以一陽來復萬物懷生空臨觀禋之辰無復稱觴之  
慶恭惟謚號皇帝道齊覆載德冒華夷從南狩於蒼梧  
神游已邈望西陵於銅雀涕慕空深

皇帝為十一月一日奏告永裕陵神宗皇帝旦  
表本

伏以始饒餘寒復興嗣歲望寢園而增慕悼日月之不  
留恭惟謚號皇帝道貫百王澤涵萬宇永瞻帝所之樂

坐起堯牆之悲饋莫莫由馳誠罔極

皇太后殿夫人為年節往永裕陵酌獻神宗皇  
帝表本

伏以葦桃在戶徒講三朝之儀椒栢稱觴無復萬年之  
壽恭惟謚號皇帝功施無外德洽有生隨鼓漏於寢園  
莫親饋奠望衣冠於原廟空極涕流

皇帝為三月一日奏告神宗皇帝旦表本

伏以既成春服時方禋洛之初祗謁寢園古有薦鮪之

禮恭惟謚號皇帝配天立極如日載陽仰餘一作澤之

陰

旁流致羣生之遂茂光靈愈遠涕慕空深

皇帝為神宗皇帝大祥往永裕陵奏告表本

伏以寢廟告成永動廓然之感栢城森列遽興拱矣之  
悲恭惟謚號皇帝澤浸函生慶垂後裔配天無極奉謨  
訓以長存示民有終悵神游之安在恭脩祥奠莫訴哀誠  
皇帝為神宗皇帝大祥內中奏告表本

伏以追號罔極實抱終身之憂祥禪有期蓋迫先王之

禮恭惟謚號皇帝睿明照世神智自天雖清廟肅雍瞻之莫見而威顏咫尺凜然常存悲慕之深華夷所共

皇太后殿夫人為神宗皇帝大祥往永裕陵酌獻表本

伏以飈馭上賓日以遠矣隙駒遄邁祥而廓然恭惟謚號皇帝道如家邦化形夷夏天地之運固代謝於陰陽草木何知徒興悲於霜露莫親饋奠惟極哀誠

十月朔本殿夫人往永裕陵酌獻神宗皇帝表

本

雨霜隕籜感閉塞於天時收潦滌場思艱難於王業恭  
惟尊謚皇帝禹功紀地堯則惟天威加四夷尚餘肅物  
之凜仁及萬彙永同挾纊之溫省奉無期瞻懷靡極

永安永昌永熙永裕陵忌辰奏告宣祖太祖太  
宗神宗皇帝表本

伏以卜年之永恩浹於華夷諱日之臨感深於臣子恭  
惟謚號皇帝文武經世威靈在天每更不樂之辰尚有



遺弓之慕山陵永望雨露增懷

永安永昌永熙陵忌辰奏告昭憲孝惠孝明孝  
章淑德懿德明德元德章懷章穆章懿章惠  
章獻明肅皇后表本

伏以周南之化刑恭儉於多方渭北之游極望思於原  
廟恭惟謚號皇后道應圖史德叅聖神顧明發之永懷  
仰徽音之如在載瞻園寢想見衣冠

皇太后殿內人為神宗皇帝忌辰朝永裕陵表

本

伏以百年之思化被於無疆終身之憂感深於不樂恭  
惟謚號皇帝德齊堯禹功陋漢唐道蓋始於正家謀方  
貽於燕翼追攀罔極慨慕徒深

永裕陵正月旦表本

伏以賓出日於暘谷堯歷方頒朝計吏於原陵漢儀具  
舉恭惟謚號皇帝功恢禹迹德邁湯仁雖歲月之屢遷  
想威神而如在載瞻園寢空極望思

永裕陵二月旦表本

伏以時方啟蟄禮及獻羔感清衍之協風怵懷思於濡露恭惟謚號皇帝文武緯世聖靈在天岱嶽泥金永講升中之禮荆山鑄鼎遽成脫屣之游永望寢園徒增感慕永裕陵四月旦表本

伏以日躔昴畢卦直乾離物蒙長養之仁世載文明之化恭惟謚號皇帝功成不宰德範無窮執炎帝之衡莫追往躅秩南郊之政空守成規祇望寢園惟增感慕

永裕陵十月旦表本

伏以戒寒瑾戶脩及於泰正前晦行陵祇循於漢禮恭  
惟謚號皇帝懿文緯世厚德載時休老勞農追述養民  
之政屬兵講武敢忘經國之謀永望寢園益增感慕

永裕陵十二月旦表本

伏以商正紀厯大呂旋宮論時令以待來歲之宜獻民  
力以共宗廟之祀恭惟謚號皇帝至仁無外全德難名  
文物聲明但覩乘時之迹昆蟲草木孰知成歲之功急

景易遷永懷何極

內制國書一十八首

皇帝達太皇太后賀大遼正旦書

元祐元年十月

肇易歲元發新榮於萬物仰遵慈誨修舊好於兩朝遠飭使軺肅將禮幣庶迎壽祉式副願言

皇帝賀大遼皇帝正旦書

元祐元年十月

獻歲發春共講三朝之慶寶鄰繼好茂膺五福之祥申飭使車往陳信幣永言欣頌曷罄諭陳

皇帝達太皇太后回大遼皇帝賀正旦書

元祐二年

正月五日

百年之好既講於春朝萬歲之儀兼陳於幄殿恭因省侍具述來音感懌之懷言宣莫罄

皇帝回大遼皇帝賀正旦書

元祐二年正月五日

東風協應感徂歲之更新遠使交馳導歡言而如舊繁然禮幣申以書詞欣懌之深敷陳罔究

皇帝達太皇太后回大遼皇帝賀正旦書

元祐

二年  
七月

嘉月令辰篤生壽母珍函重幣交慶寶鄰已恭致於德音復欽傳於慈旨其為感懌未易名言

皇帝回大遼皇帝問候書

元祐二年七月

四牡載馳遠勤於使介尺書為問申講於鄰歡方履素秋克膺純福益祈保護式副願言

皇帝達太皇太后賀大遼皇帝生辰書

元祐二年

寒律既周誕辰載紀恭被慈闈之誨俾脩慶幣之儀永

介壽康式符頌禱更祈調衛以副願言

皇帝賀大遼皇帝生辰書

元祐二年

太呂還宮攝提正丑載協誕彌之慶永膺壽考之祥臨遣使輶往陳信幣其為欣禱莫盡名言

皇帝達太皇太后賀大遼皇帝正旦書

元祐二年

歲聿肇新鄰歡載講恭被慈闈之誨遠通慶幣之誠益冀保頤永綏壽嘏

皇帝賀大遼皇帝正旦書



三陽朋來慶二儀之交泰兩朝繼好納萬民於阜昌申  
勅使車肅將禮幣願符善禱永介純釐

皇帝回大遼皇帝賀興龍節書

元祐二年十月

誕日載臨鄰歡歲講封疆雖遠晷刻不踰惟信睦之交  
脩識情文之兩至益深雅好良極欣悰

皇帝達太皇太后回大遼皇帝問候書

元祐二年十月

嘉平紀月震風惟時屬茲慶使之來重以慈闈之問尋  
因省侍悉致誠言欣感之深數陳罔究

皇帝回大遼皇帝賀正旦書

元祐三年

獻歲發春方祝永年之慶睦鄰敦好益修奕世之歡信  
幣精華書詞溫綢再維雅契良極欣悰

皇帝達太皇太后回大遼皇帝賀正旦書

元祐三年

正歲履端遠勤於華使慈闈申慶重領於珎函省侍之  
餘誠言已達永惟欣感莫究言宣

皇帝回大遼皇帝賀興龍節書

世睦寶鄰申以無窮之好歲馳華使及茲載風之辰閱

詞幣之兼隆識情文之備至願言欣感難悉究陳

皇帝達太皇太后回大遼皇帝問候書

遣使為壽既欣鄰好之脩因書見誠兼致慈闈之問侍  
言有次來意畢陳感懌之深數陳罔既

皇帝達太皇太后回大遼皇帝賀坤成節書

元祐

四年  
七月

星火西流慶慈闈之誕日皇華比至講鄰國之誠言既  
達來音俾脩報禮感銘之素敷述難周

皇帝回大遼皇帝問候書

元祐四年七月

輅車重幣已脩交慶之儀  
尺素好音復講久要之信  
屬臨素節允迪純禧益冀保頤式符企詠

內制朱表三首

景靈宮宣光殿奉安神宗皇帝御容罷散朱表

元祐二年二

月十四日

馭風雲闕既叅日月之光  
弭節琳宮尚答神民之望  
爰開法會庶款真庭願推往聖之心永錫函生之福

集禧觀洪福殿罷散謝雨道場朱表

旱暵為災禱求屢瀆賴神之賜霈澤以時蓋至道之無私豈不德之能致載陳謝懇少答靈休

中太一宮真室殿為太皇太后消災集福罷散

天皇九曜道場朱表

元祐三年

仁者必壽信惟天地之心孝無不通宜從臣子之欲虔遵道範仰扣真廷庶同海宇之誠上集慈闈之福天威咫尺求聰明於我民聖壽萬年定子孫于下地更推博

施普及函生

內制疏文十首

集禧觀開啓祈雪道場疏文

元祐元年  
二月六日

伏以麥將覆塊雪未掩塵嗣歲之憂下民安訴具嚴法  
會祇款闕宮仰冀同雲溥滋新臘

景靈宮宣光殿奉安神宗皇帝御容日開啓道

場疏文

元祐二年三  
月十四日

伏以天鑒不遠誠感則通方寶構之肇新宜神遊之降

格具嚴法席高咏靈篇內安清淨之居外錫烝黎之福

集禧觀開啓祈雨道疏文

元祐二年三月二十五日

洞淵龍王水府聖衆饑饉之患民流者朞年吁嗟之求  
詞窮於是日乃眷陰靈之宅實為雲雨之師涵濡之功  
指顧而辦罔吝天澤以答民瞻

集禧觀洪福殿等處罷散謝雨道場疏文

德有愧於動天敢辭屢請道無私而應物豈間微誠霈

一雨以成周起三農於既病仰承靈貺莫報深仁

太皇太后皇太后皇太妃受冊奏告景靈宮等

處疏文

元祐二年七月十九日

伏以祗事親闈庶幾孝治配德祖考既務極於推崇篤  
生眇冲亦敢忘於褒顯將奉寶冊率循舊章徼福于神  
先期以告

神宗皇帝御容進發前一日奏告諸宮觀等處

疏文

元祐二年九月二十五日



嵩洛之間山陵所在嚴道釋之淨宇奉衣冠之別祠恭  
擇良辰啓行仙馭敢徵福於羣聖庶流祉於含生仰叩  
真靈冀垂昭鑒

隆祐宮設慶宮醮疏文

元祐二年

伏以長樂告成光動紫宮之象清都下照誠通絳闕之  
仙祇設多儀肅陳菲薦永惟慈孝之本克享天人之心  
介萬壽之無疆錫五福之純備

西嶽廟開啓祈雨道場疏文

元祐三年七月十三日

伏以二華之尊作鎮於西極兆人所急望歲於秋成穀  
既日滋雨不時霈敢以病告于我有神閔茲將槁之苗  
賜以崇朝之澤惟神之德非我敢忘

中太一宮真室殿開啓天皇九曜消災集福道  
場疏文

臣以冲眇嗣承列聖之休濟於艱難實賴文母之德臨  
莅四載勤勞百為畏天之威未嘗終日而豫怠視民如  
子惟恐一夫之困窮伏願上帝降祥衆真垂佑消禳災

沴永底壽康恭陳寶籙之科仰扣神遊之館敢祈昭鑒  
下察孝心

皇太妃宮閣慶落成開啓道場疏文

伏以良辰襲吉華構一新仰荷褒崇之私得伸鞠育之  
報落成告備法會有嚴請命上穹馳神真聖庶精誠之  
必達錫壽祉於無窮

景靈宮罷散奉安神宗皇帝御容道場功德疏

文

元祐二年  
四月七日

伏以肇新寶構祇奉眸容脩妙供於珠庭結勝緣於淨  
衆真游永奠法會告成普冀含生悉蒙餘祉

內制齋文十七首

冬至福寧殿作水陸道場資薦神宗皇帝齋文  
伏以聖神陟降釋梵後先適更來復之辰茂薦往生之  
福虔脩淨供仰導真游

正旦於福寧殿作水陸道場資薦神宗皇帝齋文  
伏以棄黃屋以上賓莫追風馭抱烏號而永慕再歷春

朝敢仗勝緣式開淨供仰頌義堯之德永追梵釋之游  
在京諸宮觀開啟神宗皇帝大祥道場齋文

伏以密音如昨新穀再升望仙馭於帝鄉陳法筵於淨  
宇人天來會共脩最勝之緣梵釋同游永錫無疆之慶  
垂拱殿開啟神宗皇帝大祥道場齋文

伏以喪期有數方歎於壑舟法海無邊聊資於岸棧有  
嚴秘殿恭啟淨筵時御六龍徘徊宮闕永同千佛陟降  
人天

內中福寧殿下寒節為神宗皇帝作水陸道場  
齋文

伏以甚雨疾風感春律之將變鑽燧改火悼喪期之不  
留爰啟淨筵以資冥福願登大覺永濟函生

景寧宮宣光殿奉安神宗皇帝御容日開啟道  
場齋文

伏以祠宮夙啟真室告成仗勝會於佛僧導靈游於梵  
釋更推餘祉旁及含生

大相國寺開啟祈雨道場齋文

伏以旱暵既久麥禾將空仰惟天人之師宜專雲雨之施庶幾慈愍寬我憂危

鄭州超化寺祈雨齋文

伏以常暘為災歷時愈熾秋穀未熟夏苗將空天意未回佛慈所愍願以不思議智力大解脫神通時興法雲普賜甘澤

鄭州超化寺謝雨齋文

等慈應物不倦於禱求神智無方何難於膏澤早沴既  
弭農民其康仰惟不宰之功豈特有為之報爰脩淨供  
少達純誠

十月一日永裕陵下宮開啟資薦神宗皇帝道  
場齋文

橋山永望莫瞻弓劍之餘陽月載臨徒增霜露之感招  
延淨衆崇建梵筵庶集勝因仰資真馭

西京會聖宮應天禪院奉安神宗皇帝御容禮



畢開啟道場齋文

原廟告成神游既奠雖聖靈之無礙對越在天從世法  
之有為歸依於佛普願幽明之域悉登淨妙之庭集此  
勝因以資仙馭

後苑瑤津亭開啟祈雨道場齋文

六月徂夏方金火之爭三農望秋乏雷雨之施嗟人何  
罪逢歲之艱自非妙覺之等慈孰極疲民於重困有嚴  
禁苑祇建淨筵念我憂勞錫之膏澤非獨起枯焦於田

野抑將掃疾疫於里閭嘉與含生永均介福

後苑瑤津亭開啟祈雨道場齋文

伏以常暘之沴歷月於茲近自都畿遠及關輔豈獨西成之害將為宿麥之憂仰止覺慈必垂善救普集山川之守來登梵釋之筵罔吝膏濡以興焦槁

後苑瑤津亭開啟謝雨道場齋文

伏以祇畏之心格人天於影響覺慈之力反水旱於屈伸周澤載濡農田告足既解蘊隆之患庶無流潦之虞

仰冀能仁曲垂照鑒

顯聖寺壽聖禪院開啟太皇太后消災集福粉  
壇道場齋文

伏以躬儉節用本嚴房闥之風遺大投艱猥當廟社之  
寄常恐德之弗類以召災于厥身敢即仁祠肆陳淨供  
恭延梵釋普施人天俾壽而康非獨輔安於寡昧與民  
同利固將燕及於華夷仰冀能仁曲垂照鑒

景靈宮宣光殿開啟神宗皇帝忌辰道場齋文

伏以至德難名已立配天之極孝思永慕蓋有終身之  
憂惟是佛乘庶資冥福屬弓劍上賓之日就衣冠出游  
之庭虔設淨筵俾嚴勝果庶超真覺永庇含生

奉宸庫翻修聖字等庫了畢安慰土地道場齋

文

伏以貨幣所藏有壞必葺聰直之鑒既成乃安爰仗佛  
慈以綏神守庶期昭格永庇純熙

內制祝文三十三首

奏告天地社稷宗廟宮觀寺院等處祈雨雪祝

文

伏以暮年以來水旱作沴迨茲徂歲復苦常暘疾疫將興農末俱病方齋居而默禱庶精意之登聞敢祈春臘之交沛然雨雪之賜願均介福敷錫羣生

五嶽四瀆等處祈雪祝文

伏以歷冬不雪兩歲之憂疾癘將興麥麴就槁分命守土告於有神下民其咨天聽不遠毋愛同雲之澤以成

盈尺之祥苟利于民敢忘其報

內中添蓋諸帝后神御殿告遷御容權奉安於

慈氏殿祝文

於皇神考肇啟閼祠方增築之未寧懼格思之有瀆別  
嚴淨宇祇奉睟容式燕聖靈永綏慈嘏

內中慈氏殿告遷神御於新添脩殿奉安祝文  
伏以增築告成閼嚴有真儼衣冠之來復愜歎息之疑  
聞昭格穆清永綏燕翼

景靈宮奉安神宗皇帝御容祝文

伏以恭承仙馭奄宅殊庭罄海宇以駿奔儼人天之景  
從顧回日月之照少答神民之心乃眷新宮永垂餘慶  
天章閣權奉安神宗皇帝御容祝文

伏以唐虞稽古雖絕名言文武重光已新崇構下慰華  
夷之望仰摹天日之容將往宅於靈宮永懷攀慕願少  
安於秘殿無盡瞻依

內中神御殿張挂奉安神宗皇帝御容祝文

伏以祥祭告終聖靈改御優如在位威不違顏雖天日之光固難形似而神人之奉永有瞻依悲慕愈深照臨無極

神宗皇帝大祥祭訖徹饌除靈座時皇帝躬親扶神御別設一祭祝文

伏以俛就終喪禮當即遠永瞻陵廟將徹几筵攀慕若疑追懷罔極

景靈宮宣光殿奉安神宗皇帝御容畢皇太后



親詣行禮祝文

伏以奕奕祠宮巍巍天像聖靈雖遠哲命維新仰瞻如在之威永錫無疆之慶敢祈昭鑒下燭微誠

天地社稷宗廟神廟等處祈雨祝文

惟德弗類致常暘之灾斯民何辜有薦饑之懼旬浹不雨麥禾皆空循省再三夙夜祗慄引領雲霓之望援手溝壑之餘既窮之詞其忍弗聽

五嶽四瀆等處祈雨祝文

期年以來水旱作沴振廩同食冠蓋相望已責勸分公私並竭惟待一熟之麥以蘇垂死之民而冬不雨以徂春苗將秀而不實顧惟冲昧有失政刑感傷陰陽延及鰥寡既非下民之罪亦豈上帝之心惟神聰明毋愛膏澤則民有息肩之漸神無乏祀之憂

五嶽四瀆等處祈雨祝文

天人之交應若影響雨暘不順咎在貌言失之戶庭害及寰宇求治雖切不當天意之中聽言雖多未聞民病

之實刑罰有過賦役未平一人之愆百姓何罪避坐徹膳猶當許其自脩悔禍轉灾庶或救之將墜於神益反掌之易而民免擠壑之憂仰瞻雲霓待命旦夕

五嶽四瀆等處謝雨祝文

乃者常暘為灾歷時愈熾念咎責已寧丁我躬求哀籲天並走羣望果蒙膏澤之賜一拯流亡之餘我愧于民敢廢無灾之懼神終其賜願必有年之祥

神宗皇帝禪祭太皇太后親行祝文

寒暑之變忽焉再暮練祥之餘復將三月勉從即吉之  
典莫遂無窮之哀

神宗皇帝禪祭皇帝親行祝文

既祥之餘徒月而吉迫於先王之禮徒有終身之憂瞻  
仰聖靈伏深感慕

神宗皇帝禪祭皇太后親行祝文

喪期有數禪月告終哀雖未忘禮弗敢過追慕之至中  
外所同

永裕陵脩移角堠門戶栢窠奏告神宗皇帝祝

文

園寢之奉巡行以時增植所宜卜云其吉先事而告亦禮之常

永裕陵脩移角堠門戶栢窠祭告土地祝文

寢園之奉栽植以時惟爾有神實嚴所守敢祈昭鑒永底平寧

景靈宮天興殿開淘井眼祭告里域真官祝文

神游之庭井泥不食日辰之吉浚治以時諗爾明靈庶  
無悔咎

太皇太后皇太后皇太妃受冊奏告太廟并諸  
陵祝文

伏以祇事親闈庶幾孝治配德祖考既務極於推崇篤  
生眇冲亦敢忘於褒顯將奉寶冊率循舊章涓日甚良  
先期以告

西京應天禪院會聖宮修神御帳座畢功告遷

諸神御祝文

頃詔有司恭脩幄座暫安別殿以作庶工既匠事之告  
成宜真游之來復願垂昭鑒及此良辰

西京應天禪院會聖宮脩神御帳座畢工奉安  
諸神御祝文

幄座告成允協歲時之吉靈游永奠復瞻天日之光庶  
俾後人仰蒙餘慶

西京會聖宮應天禪院奉安神宗皇帝御容前

一日奏告永裕陵祝文

國家推本漢儀立郡國之廟參用唐制就佛老之祠乃  
眷洛都載瞻園寢並興靈宇以奉神嬉閔惟冲人恭蹈  
成憲謹擇良日臨遣近臣庶回日月之光少答人天之望  
神宗皇帝御容至會聖宮并應天禪院前一日  
奏告諸帝祝文

三靈眷命六聖在天崧洛之間仙釋所館惟茲吉禘之  
始當祔出游之庭念彼元臣昔皆侑食一新惟肖之像



永陪如在之神敢冀威靈曲垂鑒照

神宗皇帝御容進發前一日奏告天地社稷宗

廟等處祝文

祇畏天明率循祖武進衣冠之原廟鎮嵩洛之靈祠恭  
擇良辰啟行仙馭分遣執事並告有神

生擒西番果莊奏告永裕陵祝文

大獮獲禽必有指蹤之自豐年高廩孰知耘耔之勞憬  
彼西戎古稱右臂自嘉祐末水征擾邊至熙寧中董氈

方命於赫聖考恭行天誅非貪尺寸之疆蓋為民除蠹  
賊遂建長久之策不以賊遺子孫而西番大首領果莊  
首犯南川北連拓拔申命諸將擇利而行旋聞偏師無  
往不克吏士用命爭酬未報之恩聖靈在天難逃不漏  
之網已於八月戊戌生獲果莊頡利成擒初無渭水之  
恥鄧支授首聊報谷吉之寃謹當推本聖心益脩戎略  
務在服近而來遠期於偃革以息民仰冀威神曲垂昭鑒

西京會聖宮應天禪院奉安神宗皇帝御容奏

告諸帝祝文

於穆神考陟配在天有嚴祠宮從祀我祖時日協吉聖  
靈其安寵綏後人永錫純嘏

西京應天禪院會聖宮奉安神宗皇帝神御祝

文

於皇在天丕冒下土矧此山陵之近顧瞻兩都宅於嵩

洛之間上聯五聖有嚴淨宇

會聖宮改為真觀

祇奉粹顏願追

梵釋之遊

會聖宮改為仙聖之遊

永答人天之望

太皇太后皇太后皇太妃受冊禮畢奏謝天地  
社稷宗廟諸宮觀并諸陵祝文

至哉坤元政必先於治內養以天下孝莫大於尊親昔  
首正於號名今復嚴於典冊禮樂既具神人允諧分命  
邇臣恭致成事仰祈昭鑒永錫鴻休

諸神廟分命邇臣  
句改分命有司

東太一宮翻修殿宇奏告十神太一真君祝文  
於穆祠宮有嚴春祀吏以時而按視工揆日以修完庶  
就絜新永綏靈御仰祈昭鑒大庇含生

西路闕雨於濟瀆河瀆淮瀆廟祈雨祝文

伏以水旱之事山川所司農服穡以有秋天密雲而不  
雨愧我不德瀆於有神願為三日之霖大慰一方之望  
國有常報我其敢忘

永定院修蓋舍屋奏告諸帝后祝文

具嚴淨宇祇奉寢園眷惟焚燎之餘少緩增修之役仰  
祈昭鑒永底燕寧

永定院修蓋舍屋祭告土地祝文

伏以向因遺燼延及淨祠爰擇良辰以興衆役宜茲遣使詔示有神

內制祭文一十四首

太皇太后祭奠故夏國主祭文

乃眷外臣嗣守西服襲累世之忠順荷先朝之寵光惟天難忱錫命不永訃音遽至閔悼良深特遣使車往陳奠幣庶此恩禮貫於幽明

故皇叔祖昭信軍節度使檢校司空開府儀同

三司漢東郡王宗瑗堂祭文

惟王之生令德孝恭云何不淑懼此閔凶無復會朝載  
惻予哀往奠其寢維以飾終

故皇叔祖昭信軍節度使檢校司空開府儀同  
三司漢東郡王宗瑗下事祭文

嗚呼死生之變賢愚莫逃日月有時義當即遠哀榮之  
極禮以告終來舉奠觴往安宅室

皇叔故魏王啟殯祭文

惟靈襲累朝之餘慶兼天下之達尊祖送之儀哀榮斯  
極永惟宅兆之下未逢歲月之良參酌時宜遷神郊館  
啟殯之始寓哀斯文

皇叔故魏王外殯前一夕夜祭文

惟王之生孝友仁慈既歿元身舉國懷思矧予冲眇義  
兼父師天不我遺日月如馳出次近郊寓此仁祠親奠  
莫及寧知我悲

皇叔故魏王下事祭文



惟靈出就外郎二年于茲一日不見企予望思矧此告  
終月逝日遠雖云近郊寧復旋返築室祠宮既固既完  
雖非永歸亦可少安嗚呼哀哉

故贈太師追封溫國公馬光安葬祭文

嗚呼元豐之末天步惟艱社稷之衛中外所屬惟是一  
老屏予一人名高當世行滿天下措國於泰山之安下  
令於流水之源歲月未周綱紀略定天若相之又復奪  
之殄瘁不哀古今所共知之者神考用之者聖母馴致

其道太平可期長為宗臣以表後世往奠其葬庶知予懷

故渭州防禦使宗孺出殯一夕祭文

惟靈飭躬寡過秉德不回莫克永年遂即長夜哀榮之典國有故常死喪之戚予惟惻愴

故渭州防禦使宗孺下事祭文

嗚呼宗枝之秀罹此降灾日月有時禮當即遠奄臨窆窆肆設几筵往致予哀來歆此奠

故聽宣劉氏堂祭文

奉侍有年肅雍靡懈今其已矣良用惻然沒而有知來  
舉茲奠

故聽宣劉氏墳所祭文

盡瘁內職歸全近郊既掩諸幽往致斯奠責其寔宥極  
爾哀榮

故尚宮吳氏墳所祭文

惟爾之生服勤乃事逢日之吉歸全於郊式榮其終往

致斯奠

故尚服劉氏堂祭文

惟靈選備禁廷服勤內職逮茲淪謝良用愍傷饋奠之儀哀榮兼至

故尚服劉氏墳所祭文

惟靈服勤有年罹命不淑寃寃之事日月有時念爾永歸歆予一奠

內制導引歌辭二首

奉安神宗皇帝御容赴景靈宮導引歌詞

帝城父老三歲望堯心  
天遠玉樓深  
龍顏髣髴笙簫遠  
腸斷屬車音  
離宮春色瑣瑤林  
雲闕海沉沉  
遺民猶唱當時曲  
秋雁起汾陰

迎奉神宗皇帝御容赴西京會聖宮應天禪院  
奉安導引歌詞

經文緯武十有九年中  
遺烈震羌戎  
渭橋夾道千君長  
猶是建元功  
西瞻溫洛與神崧  
蓮宇照瓊宮  
人間俛仰

成今古流澤自無窮

東坡全集卷一百十四

欽定四庫全書

東坡全集卷一百十五

宋 蘇軾 撰

樂語十六章

春貼子詞

元祐三年

皇帝閣六首

藹藹龍旂色琅琅木鐸音數行寬大詔四海發生心  
暘谷賓初日清臺告協風願如風有信長與日俱中  
草木漸知春萌芽處處新從今八千歲合抱是靈椿

聖主憂民未解顏  
天教瑞雪報豐年  
蒼龍掛闕農祥正  
慶一作老穉相呼看藉田

昨夜東風入律新  
玉闕知有受降人  
聖恩與解河湟凍  
得共中原草木春

翰林職在明光裏  
行樂詩成拜舞中  
不待驚開小桃杏  
始知天子是天公

太皇太后閣六首

凋刻春何力  
欣榮物自知  
發生雖有象  
覆載本無私



小殿黃金榜朱簾白玉鉤一聲雙日蹕春色滿皇州  
仗下春朝散宮中晝漏稀兩廂休侍御應下讀書帷  
五日占雲十日風憂懃終歲為三農春來有喜何人見  
好學神孫類祖宗

共道十年無臘雪且欣三白壓春田盡驅南畝扶犁手  
稍發中都朽貫錢

不獨清心能省事應緣克己自消兵傳聞塞外千君長  
欲趁新年賀太平

皇太后閣六首

寶冊瓊瑤重新庭松桂香雪消春未動碧瓦麗朝陽  
瑞日明天仗仙雲擁壽山倚欄春晝永金母在人間

朝罷金鋪掩人間寶瑟塵欲知慈儉德書史樂青春

仙家日月本長閒送臘迎春豈亦然

一作亦偶

翠管銀罌傳

故事金花綵勝作新年

彤史年來不絕書三朝德化婦承姑宮中侍女減珠翠  
雪裏貧民得袴襦

邊庭無事羽書稀  
閒遣詞臣進小詩  
共助至尊歌喜事  
今年春日得春衣

皇太妃閣五首

葦桃猶在戶椒栢已稱觴  
歲美風先應朝回日漸長  
甲觀開千柱飛樓擢九層  
雪殘烏鵲喜翔舞下觚稜

孝心日奉東朝養  
儉德應師大練

一作太姒

風太史新年瞻

瑞氣四星朗潤紫宮中

九門掛月未催班  
清禁風和玉漏閒  
崇慶早朝銀燭下

珮環聲在五雲間

東風弱柳萬絲垂的皜殘梅尚一枝  
繭館乍欣蠶浴後  
禡壇猶記燕來時

夫人閣四首

綵勝鏤新語酥槃滴小詩  
昇平多樂事應許外庭知  
細雨曉風柔春聲入御溝  
已漂新荇沒猶帶斷冰流  
扶桑初日映簾昇已覺銅瓶暖不冰  
七種共挑人日菜  
千枝先剪上元燈

雪消鴛瓦已流澌  
風暖犀盤尚鎮帷  
縹緲紫簫明月下  
壁門桂影夜參差

端午貼子詞

元祐三年

皇帝閣六首

盛德初融後潛陰未妬時  
侍臣占易象明兩作重離  
採秀擷羣芳爭儲百藥良  
太醫初薦艾庶草驗蕃昌  
微涼生殿閣習習滿皇都  
試問吾民愠南風為解無  
西檻新來玉宇風  
侍臣茗盃得雍容  
庭槐似識天顏喜

舞破清陰作兩龍

講餘交翟轉回廊始覺深宮夏日長揚子江心空百鍊  
只將無逸鑑興亡

一扇清風灑面寒應緣飛白在冰紈坐知四海蒙膏澤  
沐浴君王德似蘭

太皇太后閣六首

漸臺通翠浪暑殿轉清風簾捲東朝散金鳥未遽中  
日永蠶收簇風高麥上場朝來藉田令旅黍獻時芳

舞羽諸羌伏銷兵萬彙蘓只應黃紙誥便是赤靈符

令節陳詩歲歲新從臣何以壽吾君願儲醫國三年艾  
不作沉湘九辨文

忠臣諒節今千歲孝女孤風滿四方不復巫陽占郢夢  
空餘仲御扣河章

長養恩深動植均只憂貪吏尚殘民外廷已拜梟羹賜  
應助吾君去不仁

皇太后閣六首

露簾琴書冷瓊槃餐餌新深宮猶畏日應念暑耘人  
萬壽菖蒲酒千金琥珀杯年年行樂處新月掛池臺  
翠筒初室棟薌黍復纏菰水殿開冰鑑瓊漿凍玉壺  
秘殿扶疎夏木深雨餘初有一蟬吟應將羸女乘鸞扇  
更助南風長棘心

上林珍木暗池臺蜀產吳包萬里來不獨槃中見盧橘  
時於樓裏得楊梅

閔楚遺風萬古情湘沅舊俗到金明翠輿黃繖何時幸



畫鵲飛鳧盡日橫

皇太妃閣五首

午景簾櫳靜薰風草木酣誰知恭儉德綵縷出親蠶  
雨細方梅夏風高已麥秋應憐百花盡綠葉暗紅榴  
辟兵已佩靈符小續命仍縈綵縷長不為祈禳得天助  
要隨風俗樂時康

玉盆沉李灑清泉金鴨噓空裊細烟自有梧楸郭畏日  
仍欣麥黍報豐年

良辰樂事古難同  
繡繭朱絲奉兩宮  
仁孝自應禳百沴  
艾人桃印本無功

夫人閣四首

肅肅槐庭午沉沉玉漏稀  
皇恩樂佳節關草得珠璣  
節物荆吳舊嬉游禁掖閒  
仙風隨畫簾拜賜落人間  
五綵縈筒秫稻香千門結艾  
鬢髯張旋開寶典尋風物  
要及靈辰共袞襪

欲曉銅瓶下井欄  
鏗鏘金殿發清寒  
似聞人世南風熱

日上牆東問幾竿

內中御侍以下賀冬至詞語

元祐二年十月二十日

皇帝

伏以月臨天統首冠於三正氣應黃宮復來於七日君  
道寢長陽德光亨恭惟皇帝陛下清明在躬仁孝遍物  
垂衣南面天何言而四時成學問西清日將旦而羣陰  
伏裔夷奔走年穀順成豈惟四海之歡心自識三靈之  
陰贊如川方至受命無疆妾等待罪掖庭備員婦職共

慶一陽之節敢陳萬歲之觴

太皇太后

伏以消長有時候微陽之來復賢愚同慶知君子之彙  
征德化所加神人並應恭惟太皇太后陛下睿明天縱  
慈儉身先振河嶽以不傾地無私載順陰陽而自化天  
且不違成功已陋於漢唐論德蓋高於任姒大有上吉  
方獲助於三靈既醉太平當純備於五福妾等職叅長  
御心奉慈闈慶陽德之朋來願天壽之平格

皇太后

伏以矇眊奏功驗人和於緹室日官占物效歲美於黃  
雲慶自宮庭澤均海宇恭惟皇太后殿下輔佐內治儀  
刑王家推美國風夙茂周南之化考祥義易共成坤厚  
之功方迎日於三微敢稱觴於萬壽豈獨宮闈之願實  
同中外之歡妾等猥以微軀被蒙慈渥仰獻岡陵之祝  
庶殫草木之誠

內中御侍以下賀年節詞語

元祐二年十  
二月一日

皇帝

伏以齊七政於璣衡天人並應受三朝之圖籍海宇來  
同恭惟皇帝陛下至仁無私神武不殺祖述堯帝歷象  
以授民時儀刑文王正家而齊天下方肇新於歲律宜  
嚮用於神休妾等幸侍禁嚴仰陶化育願上萬年之壽  
永膺百順之祥

太皇太后

伏以太簇旋宮既贊陽而出滯勾芒司歷方布德以綏

刑恭惟太皇太后陛下化始六宮風行九有損財振廩  
救民溝壑之中求賢審官拔士茆茨之下方履端之資  
始膺景福於無疆妾等幸侍禁嚴粗供婦職願獻岡陵  
之壽少輸草木之誠

皇太后

伏以三元資始礪穰以餞餘寒萬寶更新燔烈以興嗣  
歲恭惟皇太后殿下道光鴻泐德配周南輔導兩朝孝  
慈格於上下儀刑九御恭儉聞於邇遐順履三陽誕膺

百祿妾等幸班禁掖久被餘光莫報生成之恩但祝靈  
長之算

內中御侍以下賀冬至詞語

元祐三年十月三十日

皇帝

伏以日合天統時推建子之正律中黃鍾氣驗微陽之  
應德施自上惠均於民伏惟皇帝陛下道配皇王化行  
夷夏觀其來復見乎天地之心靜以無為待此陰陽之  
定雲物告瑞宮聲協和豈惟至治之祥自得上天之祐



一人有慶萬壽無疆妾等蒙被天光叨塵婦職敢獻如  
山之祝庶同率土之歡

太皇太后

伏以書奏清臺驗歷象之遷密日移黃道迎化國之舒  
長寰宇和平宮闈歡豫恭惟太皇太后陛下教隆陰禮  
位正坤儀嗣太任之徽音道光千古衣明德之大練儉  
化六宮體柔靜以臨朝配清明而燭物慶雲可望共占  
至治之祥彤史何知莫贊無為之德妾等猥參女職仰

奉慈顏因來復之一陽祝無疆之萬壽

皇太后

伏以候氣葭灰喜律筒之已應課功絲線知宮日之初  
長品物向榮掖庭胥悅恭惟皇太后殿下母臨四海婦  
應東朝求賢審官但有憂勤之志躬儉節用豈忘澣濯  
之衣宜福祿之日康樂宮闈之無事妾等濫塵女職獲  
奉慈顏願先栢酒以稱觴更指椿年而獻壽

坤成節集英殿宴教坊詞

元祐二年七月十五日

教坊致語

臣聞視履考祥既占衷月之夢對時育物必有繼天之  
功方大火之西流履陰靈之既望帝於是日誕降仁人  
意使斯民咸歸壽域共慶千年之遇得生二聖之朝式  
宴示慈與民同樂恭惟皇帝陛下文思天縱睿哲生知  
力行禹湯之仁常恐一夫之不獲躬蹈曾閔之孝故得  
萬國之歡心恭惟太皇太后陛下道契天人德超載籍  
知人則哲蓋帝堯之所難修已安民雖虞舜其猶病風

雲從而萬物覩日月照而四時行自然動植之咸安莫  
知天地之何力三宮交慶羣后駸奔寶鄰通四牡之歡  
航海致重譯之賁洞庭九奏始識咸池之音靈嶽三呼  
共獻後天之祝臣等叨居法部輒採民言上瀆宸聰敢  
陳口號

口號

三朝遺老九門前又見承平大有年文母憂勤初化俗  
曾孫仁孝已通天史書元祐三千牘樂奏坤成第一篇

欲採蟠桃歸獻壽蓬萊清淺半桑田

勾合曲

秋風協應生殿角之微涼廣樂具陳韻金絲而間作欲  
觀鳥獸之率舞願聞笙磬之同音上奉宸顏教坊合曲

勾小兒隊

朱干玉戚本以象功白叟黃童皆知頌聖盍命髧髧之  
侶來陳舞勺之儀上侑皇歡教坊小兒入隊

隊名

願同千歲樂奏太平謠

問小兒隊

鎬京廣燕方雲集於縉紳沂水游童忽鳬趨於庭廡雖  
云小技必有可觀咫尺天顏悉言汝志

小兒致語

臣聞功存社稷慶鍾高密之門澤及本枝天祚太任之  
德候西風之入律藹瑞氣之盈庭嘉與四方同稱萬壽  
恭惟皇帝陛下文思稽古濬哲在躬日奉東朝之歡率

用家人之禮以謂慈儉之化無德而能名保佑之功如  
天之難報惟流傳於歌舞庶髣髴其儀刑臣等雖在弱  
齡久陶孝治敢率垂髫之侶共陳振萬之儀未敢自專  
伏取進止

勾雜劇

鸞旗日轉雉扇雲開暫回綬兆之文少進俳諧之技來  
陳善戲以佐歡聲上樂天顏雜劇來歟

放小兒隊

青衿旅進雖末技而畢陳黃屋天臨知下情之無壅既  
成文於綴兆爰整袂以徘徊再拜天階相將好去

勾女童隊

彤壺漏箭隨雞唱以漸移絳節綵髻聞鳳簫而自舉宜  
召散花之侶來陳回雪之姿上奉宸歡兩軍女童入隊

隊名

金風回翠袖玉琯倚清歌

問女童隊



鳳歌諧律方資燕俎之歡鷺羽分庭忽集壽山之下低  
鬟有待振袂欲前密邇天階悉陳來意

女童致語

妾聞塗山啟夏來玉帛於萬邦摯仲興周昨本枝於百  
世嘉辰共樂壯觀一新恭惟皇帝陛下舜孝自天堯仁  
浹物膺昊穹之成命席累聖之詒謀惟地勢坤永載無  
疆之德以天下養躬持胥樂之觴六樂在庭百工奏技  
妾等親逢盛旦獲望嚴宸藝雖愧於驚鴻心已先於儀

鳳願陳舞綴上奉天顏未敢自專伏取進止

勾雜劇

風清羽蓋日轉槐庭欲資載笑之歡必有應諧之妙暫  
回舞綴少進詼辭上悅天顏雜劇來歟

放女童隊

八音間作既成皦繹之文萬舞畢陳曲盡回翔之態望  
彤闌而却立歛翠袂以言歸再拜天墀相將好去

集英殿春宴教坊詞

教坊詞語 中和化育萬壽排場

臣聞人和則氣和故王道得而四時正今樂猶古樂故  
民心悅而八音平幸此聖朝陶然化國飭三農於保介  
維暮之春興五福於太平既醉以酒恭惟皇帝陛下乘  
乾有作出震無私憲章六聖之典謨斟酌百王之禮樂  
天方祚於舜孝人已誦於堯言故得彛倫叙而水土平  
北流軌道壬人退而蠻夷服西旅在庭稍寬中昊之憂  
一均湛露之澤方將麴蘖羣賢而惡旨酒鼓吹六藝而

放鄭聲雖白雪陽春莫致天顏之一笑而獻芹負日各  
盡野人之寸心臣猥以賤工叨塵法部幸獲望雲之喜  
敢陳擊壤之音不揆蕪才上進口號

口號

萬人歌舞樂芳辰長養恩深第四春  
令下風雷常有信時來草木豈知仁  
璫璣已正三階泰玉琯初知九奏純  
更欲年年同此樂故應相繼得元臣

勾合曲

太平無象善萬物之得時和氣致祥喜八風之從律大  
合鈞天之奏克諧治世之音上奉嚴宸教坊合曲

勾小兒隊

斑白之老既無負戴之憂齠齖之童亦遂嬉遊之樂行  
歌道路聯袂闕庭仰奉宸慈小兒入隊

隊名

初成暮春服來獻太平謠

問小兒隊

聚戲里閭豈識九重之奧成文綴兆忽隨六樂之和宜  
近形墀悉陳來意

小兒致語

臣聞春為陽中生物各遂其性樂以天下聖人豈私其  
身故飲食盡忠臣心而遊豫為諸侯度方遲日之無事  
矧嗣歲之有年大啟璧門肅陳燕豆恭惟皇帝陛下道  
隆而德備質文而性仁總攬羣才蓋天受之神策澄清  
庶政故民獻以寶符顧良辰樂事之難并宜羣臣嘉賓

之並集廣場千步方山立於衆工大樂九成固海函於  
雜技臣等沐浴膏澤咏歌昇平幸以髣髴之微得參舞  
羽之末敢干宸聽伏俟俞音

勾雜劇

臚傳已久陞楯將更宜資載笑之歡少進羣優之技緩  
調絲竹雜劇來歟

放小兒隊

清歌屢奏益曲盡於下情妙舞載陳示不遺於小物既

畢沛風之和稍同沂水之歸再拜天階相將好去

勾女童隊

燕私之樂下侍於臣工靡曼之觀聊同於俚俗審音而作振袂稍前上奉宸歡兩軍女童入隊

隊名

瑞日明歌扇仙飈動舞衣

問女童隊

工師奏技侍衛聳觀顧游女之何施集彤庭而有待欲



知來意宜悉敷陳

女童致語

妾聞聖人授民以時王者與衆同樂故倉庚鳴而蠶女  
出游魚躍而靈沼春蓋良辰豈易得哉亦賢者而後樂  
此伏惟皇帝陛下溫恭允塞緝熙光明學無常師文武  
識其大者仁能濟衆堯舜其猶病諸齊泰階之六符走  
重譯之萬里天人並應禮樂將興豈惟塵土之賤微敢  
度乾坤之廣大萬舞九奏雖未象於成功間歌三終亦

庶幾於頌德欲殫末技少効寸誠

勾雜劇

風斜御柳既窮綺麗之觀日轉庭槐少進詼優之戲再  
調絲竹雜劇來歟

放女童隊

翠袖風回已盡折旋之妙文茵霞卷尚觀顧步之餘再  
拜天墀相將好去

集英殿秋宴教坊詞

教坊致語

臣聞天無言而四時成聖有作而萬物覩清淨自化雖  
仰則於帝心愷悌不回亦俛同於衆樂屬此九秋之候  
粲然萬寶之成吾王不游何以勞農而休老君子如喜  
則必大亨以養賢恭惟皇帝陛下孝通神明仁及草木  
行堯禹之大道守成康之小心華夷來同天地並應以  
謂福莫大於無事瑞曷加於有年南極呈祥候秋分而  
老人見西夷慕義涉流沙而天馬來嘉與臣工肅陳燕

俎禮元侯於三夏諧庶尹於九成宣示御觴聳近臣之  
榮觀臚傳天語溢兩廡之歡聲臣等幸覲昌辰叨塵法  
部採謠言於擊壤助矇眊之陳詩仰奉威顏敢進口號

口號

霜霏碧瓦尚生烟日泛彤庭已集仙藹藹四門多吉士  
熙熙萬國屢豐年高秋爽氣明宮殿元祐和聲入管絃  
菊有芳兮蘭有秀從臣誰和白雲篇

勾合曲

西風入律間歌秋報之詩南籥在廷備舉德音之器絃  
匏一倡鐘鼓畢陳上奉宸嚴教坊合曲

勾小兒隊

皇慈下逮罄百執以均歡衆技畢陳示四方之同樂宜  
進垂髫之侶來脩秉翟之儀上奉威顏教坊小兒入隊

隊名

登歌依頌磬下管舞成童

問小兒隊

大君有命肆陳管磬之音童子何知入造工師之末欲  
詳來意宜悉奏陳

小兒致語

臣聞天行有信正得秋而萬寶成君德無私日將旦而  
羣陰伏清風應律廣樂在庭占歲事於金穰望天顏之  
玉粹沐浴膏澤詠歌升平恭惟皇帝陛下天縱聰明日  
躋聖知無一物之失所得萬國之歡心雖擊壤之民固  
何知於帝力而後天之祝亦各抒於下情臣等幸以韶

訖之年得居仁壽之域詠舞雩於沂水久樂聖時唱銅

鞀於漢濱空慚郢

一作  
俚

曲願陳舞綴少奉宸歡未敢自

專伏候進止

勾雜劇

朱絃玉管屢進清音華翟文竿少停逸綴宜進謳諧之  
技少資色笑之歡上悅天顏雜劇來歟

放小兒隊

回翔丹陛已陳就日之誠合散廣庭曲盡回風之妙歌

鐘告闕羽籥言旋再拜天階相將好去

勾女童隊

錦薦雲舒來九成之丹鳳霞衣鱗集隱三疊之靈龜上  
奉宸嚴教坊女童入隊

隊名

香雲浮繡宸花浪舞彤庭

問女童隊

清禁深嚴方縉紳之雲集仙音彈緩忽簪珥之星陳徐



步香茵悉陳來意

女童致語

妾聞鈞天廣樂空傳帝所之游閭闔清風理絕庶人之  
共夫何仙聖靡隔塵凡仰瞻八采之威目慶千齡之運  
恭惟皇帝陛下乾健而粹離明而文規摹六聖之心人  
將自化儀刑文母之德天且不違樂茲大有之年申以  
宗慈之會虞韶既畢夏籥將興妾等分綴以須審音而  
作願俟工歌之闋少同率舞之歡未敢自專伏取進止

勾雜劇

絃匏迭奏千羽畢陳洽聞舜樂之和稍進齊諧之技金  
絲徐韻雜劇來歟

放女童隊

羽觴湛湛方陳既醉之詩鼙鼓淵淵復奏言歸之曲  
戔髮佇立歛袂却行再拜天階相將好去

興龍節集英殿宴教坊詞

元祐二年

教坊致語

臣聞帝武造周已兆興王之迹日符祚漢實開受命之  
祥非天私我有邦惟聖乃作神主仰止誕彌之慶集於  
建丑之正瑞玉旅庭爰講比鄰之好虎臣在泮復通西  
域之琛式燕示慈與人均福恭惟皇帝陛下睿思冠古  
濬哲自天煥乎有文日講六經之訓述而不作思齊累  
聖之仁夷夏宅心神人協德卜年七百方過歷以承天  
有臣三千咸一心而戴后彤庭振萬玉座傳觴誦干戈  
載戢之詩作君臣相悅之樂斯民何幸白首太平臣猥

以微生親逢盛旦始慶猗蘭之會願廣擊壤之音下採  
民言上陳口號

口號

凜凜重瞳日月新四方驚喜識天人共知若木初升旦  
且種蟠桃莫計春請吏黑山歸屬國給扶黃髮拜嚴宸  
紫皇應在紅雲裏試問清都侍從臣

勾合曲

祝堯之壽既罄於歡謠象舜之功願觀於備樂羽旄在

列管磬同音上奉宸嚴教坊合曲

勾小兒隊

魚龍奏技畢陳詭異之觀韶武成童各效回旋之妙嘉其尚幼有此良心仰奉宸慈教坊小兒入隊

隊名

兩階陳羽籥萬國走梯航

問小兒隊

工師在列各懷自獻之能俵子盈庭必有可觀之技未

知來意宜悉奏陳

小兒致語

臣聞生民以來未有祖宗之仁厚上帝所眷錫以聖神  
之子孫孚佑下民篤生我后瞻舜瞳之日月望堯顙之  
山河若帝之初達四聰於無外如川方至傾萬宇以來  
同恭惟皇帝陛下齊聖廣淵剛健篤實識文武之大者  
體仁孝於自然歌詩思齊見文王之所以聖誦書無逸  
法中宗之不敢康誕日載臨輿情共祝神筴授萬年之

算洛書開五福之祥臣等嬉遊天街沐浴皇化欲陳舞蹈之意不知手足之隨未敢自專伏取進止

勾雜劇

金奏鏗純既度九韶之曲霓裳合散又陳八佾之儀舞綴暫停伶優間作再調絲竹雜劇來歟

放小兒隊

游童率舞逐物性之熙怡小技畢陳識天慈之廣大清歌既闋疊鼓屢催再拜天階相將好去

勾女童隊

垂鬟在列歛袂稍前豈知北里之微敢獻南山之壽霓  
旌望集金奏方諧上奉威顏兩軍女童入隊

隊名

君臣千載遇歌舞八方同

問女童隊

撻撻屢作旌旆前臨顧游女之何能造彤庭而獻技欲  
知來意宜悉奏陳



女童致語

妾聞瑞乙來翔共紀生商之兆羣龍下集適同浴佛之  
辰佳氣充庭和聲載路輦出房而雷動扇交翟以雲開  
喜動人天春還草木恭惟皇帝陛下凝神昭曠受命穆  
清三后在天宜興王之世有四人迪哲知享國之無窮  
乃眷良辰欲均景福庭設九賓之禮樂歌四牡之章妾  
等幸覩昌期獲瞻文陛雖乏流風之妙願輸率舞之誠  
未敢自專伏候進止

勾雜劇

清淨自化雖莫測於宸心  
詠笑雜陳示俛同於衆樂  
金絲再舉雜劇來歟

放女童隊

分庭久立漸移愛日之陰  
振袂再成曲盡回風之態  
龍樓却望鼙鼓屢催再拜  
天階相將好去

紫宸殿正旦教坊詞

元祐四年

教坊致語

臣聞行夏之時正莫加於人統採周之舊王方在於鎬  
京惟吉月之布和休庶工而未作使華遠集鄰好交脩  
萃簪笏於九門來車書於萬里將興嗣歲以樂太平恭  
惟皇帝陛下躬履至仁誕膺春命法天地四時之運民  
日用而不知傳祖宗六聖之心我無為而自化九德咸  
事三年有成始御八音之和以臨元日之會人神相慶  
夷夏來同臣等忝與賤工得親壯觀知輿情之願頌顧  
盛德之難形不度荒蕪敢進口號

口號

九霄清蹕一聲雷萬物欣榮意已開  
曉日自隨天仗出春風不待斗杓回  
行看菖葉催耕耜共喜椒花映壽杯  
欲識太平全盛事振振鵷鷺滿雲臺

勾合曲

東風應律南籥在庭餞臘迎春方慶三朝之會  
登歌下管願聞九奏之和上悅天顏教坊合曲

勾小兒隊

工師奏技咸踴躍以在庭穉孺聞音亦回翔而赴節方  
資其樂豈間微情上奉宸歡教坊小兒入隊

隊名

仙山來絳節雲海戲羣鴻

問小兒隊

六樂充庭九賓在列何彼垂髫之侶欲陳振袂之能必  
有來誠少前敷奏

小兒致語

臣聞正月上日萬彙所以更新羣臣嘉賓四方於焉觀  
禮雪方占於上瑞風已告於先春及此良辰設為高會  
恭惟皇帝陛下子來九有天覆兆民煥乎其有文章昭  
然若揭日月安西都護來輸八國之琛南極老人出效  
萬年之壽還圭璋於鄰使受圖籍於春朝擊石縱金奏  
鈞天之廣樂跳毬舞索戲平樂之都場臣等沐浴太平  
詠歌新歲鼓舞咸韶之韻踰揚鳥獸之間未敢自專伏  
候進止

勾雜劇

以雅以南既畢陳於衆技載色載笑期有悅於威顏舞  
綴暫停優詞間作金絲徐韻雜劇來歟

放小兒隊

酒闌金殿既均湛露之恩漏減銅壺曲盡流風之妙望  
彤墀而申祝整翠袖以言歸再拜天階相將好去

興龍節集英殿宴教坊詞

教坊致語

臣聞天所眷命生而神靈惟三代受命之符萃於茲日  
實萬世無疆之福延及我民候南極之祥輝交北鄰之  
瑞節同趨燕鎬爭頌堯封恭惟皇帝陛下稽古溫文乘  
乾剛粹體生知而猶學藏妙用於何言故得六聖承休  
三靈眷佑德隆星昴齊六符而泰階平河行地中錫九  
疇而彛倫正屬誕彌之令旦履長發之嘉祥夙設九賓  
於廷遍舞六代之樂日無私於臨照葵藿自傾天有信  
於發生勾萌必達臣等歷塵法部獲造彤墀下採民言



得三萬里之謠頌登歌壽筭以八千歲為春秋不度燕  
音敢進口號

口號

風卷雲舒合兩班  
瞳瞳瑞日映天顏  
觀書已獲千秋鏡  
積德長為萬壽山  
臘雪未消三務起  
壬人不用五兵閒  
相逢父老爭相賀  
却笑華胥是夢間

勾合曲

笙磬同音考中聲於神鼓  
鳥獸率舞浹和氣於敷天上

奉宸歡教坊合曲

勾小兒隊

衆技旅庭振歡聲於無外游童頌聖陶至化於自然上  
奉皇威教坊小兒入隊

隊名

壤歌皆白髮象舞及青衿

問小兒隊

跳踉廣陌初疑竹馬之遊合散彤墀忽變驚鴻之狀欲

知來意宜悉敷陳

小兒致語

臣聞流虹啟聖非人力所致之符湛露均恩與天下共  
享其樂旁行海宇外薄戎夷咸欣載夙之辰共獻無疆  
之祝恭惟皇帝陛下神武不殺將聖多能天生德於予  
既稟狗齊之質人樂告以善輔成經緯之文法慈儉於  
東朝紬詩書於西學載臨誕日俛答輿情非為靡曼之  
觀庶備太平之福臣等樂生齟齬學樂父師就列紛紜

雖無殊於鳥獸赴音俛仰亦少致於涓塵未敢自專伏  
候進止

勾雜劇

樂且有儀乃古君之相悅張而不弛豈文武之常行歟  
佐歡聲宜陳善謔金絲徐韻雜劇來歟

放小兒隊

末技畢陳下情無壅既成文於綴兆猶歛袂以回翔再  
拜天階相將好去

勾女童隊

飛步壽山起香塵於羅襪散花御路泛回雪於錦茵上  
奉宸顏兩軍女童入隊

隊名

生商來瑞馱浴佛降羣龍

問女童隊

玉座天臨雖仙凡之有隔翠鬟雲合豈草木之無知密  
邇天階悉陳來意

女童致語

妾聞千里一曲變澄瀾於濁河萬歲三稱隱歡聲於靈  
岳天人並應夷夏來同雖云北里之微敢獻華封之祝  
恭惟皇帝陛下睿文冠古神智無方同堯舜之性仁而  
能濟衆陋成康之刑措猶待積年共欣建丑之正再覩  
興龍之會桑田東海傾壽筭而未乾汗竹南山書頌聲  
而無極妾等幸緣賤藝獲望載顏振萬子庭欲赴干旄  
之節間歌以雅庶諧笙磬之音未敢自尊伏候進止

勾雜劇

舞綴暫停歌鐘少闕必有應諧之妙以資載笑之歡上  
悅天顏雜劇來歟

放女童隊

振袂再成曲盡回風之妙分庭久立漸移愛日之陰再  
拜天階相將好去

齋日致語口號

旋復陰陽配五支於六幹誕彌歲月與元旦為三申神

后降慶於當年曾孫効誠於茲旦不煩巧厯自契真符  
道俗謹謠天人協應太皇太后陛下功高任姒德配唐  
虞上推顧托之心下布仰成之政寶慈與儉蹈光憲之  
成規却敵安邦襲烈武之餘慶三朝順履萬壽維新雖  
絳縣之老人難窮甲子如楚南之靈木莫計春秋臣賤  
等草茅心傾葵藿採民謳於擊壤効樂語之陳詩

媯皇得道自神仙金母長生不記年甲子會逢三朔旦  
歲星行看百周天消兵漸覺腰無犢種德方知福有田



彤管何人書後會  
椒花椿頌一時編

黃樓致語口號

百川返壑五稼登場初成百尺之樓適及重陽之會高  
高下下既休畚鍤之勞歲歲年年共覩茱萸之美恭惟  
知府學士民人所恃憂樂以時度餘力而取羨材因備  
灾而成勝事起東郊之壯觀破西楚之淫名賓客如雲  
來四方之豪傑鼓鐘隱地竦萬目之觀瞻實與徐民長  
為佳話

一新柱石壯嚴闔更值西風落帽辰不用游從誇燕子  
直將氣焰壓波臣山川尚遠當時國城郭猶飄廣陌塵  
誰凭欄杆賞風月使君留意在斯民

趙倅成伯母生日致語口號

昔年占夢適當重九之佳辰今日獻香願祝大千之遐  
算慶婦姑之同日雜茱菊以稱觴殺雞已效於龐公剪  
髮敢資於陶母但某叨居樂部忝預年家不度蕪材上  
塵口號

今朝壽酒泛黃花鬱鬱葱葱氣滿家願得唐兒舞一曲  
莫嫌國小向長沙

王氏生子致語口號

人中五日知織女之暫來海上三年喜花枝之未老事  
協紫銜之夢歡傾白髮之兒好人相逢一杯徑醉伏以  
某人女郎蒼梧仙裔南海貢餘憐謝瑞之早孤潛炊相  
助歎張鎬之沒興遇酒輒歡采楊梅而朝飛擘青蓮而  
暮返長新玉女之年貌未厭金膏而掃除萬里棄桴已

慕仲尼而航海五絲繡鳳將從老子以俱仙東坡居士  
尊俎千峯笙簧萬籟聊設三山之湯餅共傾九醞之仙  
醪尋香而來苒天風之引步此興不淺炯江月之升樓  
羅浮山下已三春松筠穿階晝掩門太白猶逃水仙洞  
紫簫來問玉華君天容水色聊同夜髮澤膚光自鑑人  
萬戶春風為子壽坐看滄海起揚塵


寒食宴提刑致語口號

良辰易失四者難并故人相逢五斗徑醉况中年離合

之感正寒食清明之間時乎不可再來賢者而後樂此  
恭惟提刑學士才本天授學為人師事業存乎斯民文  
章蓋其餘事望之已試於馮翊翁子暫還於會稽知府  
學士接好鄰邦締交冊府莫逆之契義等於天倫不腆  
之辭意勤於地主力講兩君之好可無七子之詩欲使  
異時爭傳盛事

雲間畫鼓疊春雷千騎尋芳戲馬臺半道已逢山簡醉  
萬人爭看謫仙來淮西按部威尤凜歷下懷仁首重回

還把去年留客意折花臨水更徘徊



東坡全集卷一百十五